



Extrait de la revue **SingulierS** du 2^{ème} trimestre 2008

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : **Éditorial**

C' est l' douze d' avri passé, ou Çante culturèl d' Ottignies, k' l' Union culturelle wallonne è rassan.né sès mambes, pou s' « Congrès statutaire et d'orientation 2008 ». Ç' astot adon l' moumint d' ranovler s' Consèy d' administrâcion èt lès rprésantants d' sès soces. Cès soces la, ki sont a pon près a trwâs çants, c' èst dès dès troupes du tàyâte, dès copin'rîes, dès soces litèrères, dès scoles du walon...

Nosse province du Lucsambour, k' astot mou bin rprésantêye çu vesprêye la, è veû trwâs d' sès djins élus ô Consèy d' administrâcion. Dj' avins dja dpûs lontins deûs mambes dins ç' comité la, mès ç' còp ci, avu in trwâjime ruprésantant, dju compurnans vormint bin k' on sét a Lîdje, k' on put compter su nous-ôtes. Jean-Marie Mottet, èst toudi la, come Vice-prèsident l' U.C.W. ; Christian Robinet, fwêt su rtoûr come délégué dul Fèdèrâcion (F.C.W.G.L.B.) èt Monique Tiereliers, k' avot dja dné in fèl còp du spale ô sècrètiariat, è adon sté élûe Sècrètère du l' Union. In mandat fwârt important, ki lî va dner brâmint d' ovrâdje èt d' rèsponsabilités... Dju la fèlicitans d' tout keûr pou sa nominâcion.

Tês-s' k' èle su sintot dja in pô dins la pê d' ène dèvouwêye mambe du l' U.C.W., nosse chère Monike, pou aturprinde ô moumint d' l' Assancion : « Li voyède du Mons ». Ca ç' djour la, c'è-st-ène ardêur d' avance, k' i lî falot, pou mon.ner la dîjin.ne d' èfants ki rprésantint nosse province, al finale dès rëcitâcions walones a Mons, tout passant pa Lîdje pou prinde lu câr. « Ardante la vayante ! » K' èle s' è dit, nosse sècrètère, an s' lèvant bin yeûre çu djoûr la.

I falot rassan.ner tous ces èfants la, pou lès mon.ner prinde lu câr ki lès atindot ou Trianon. Adon, an route pou l' Mwin.ni, tchèrdjer lès sèt scolîs dins deûs ôtos. Monike fwêt l' tacsî, ca dvant, èle dèt passer kêre ène pitite rëcitante a Môtche. Èt pûs tout rpassant ou Mwin.ni, èle ruprind kékes èfants èt passe duvant l' ôte ôto, ki la va chûre pou trouvu su tchmin dins Lîdje. La co bin k' èle counu la vile come sa potche.

Arivé ou Trianon, on monte dins l' câr, mès i manke èn-èfant, ku lès parints avint promètu d' amon.ner zès min.me. On fwêt l' apèl... Pont d' rusponse. I fôt 'nn-aler. Èt l' deûjime pârtîe du voyâdje cumince : twâs eûres du vòye... C' èst lonzin pou cès scolîs la k' avint dja passé dpus d' ène eûre dins lès ôtos. Arivé a in kilomète du çante du Mons, dû ç' k' on lès ratindot, vla la route blokêye, in camion stôré apêtche du passer. Adon Monike va prinde sès responsabilités, avu lès djins d' Lîdje : mon.ner lès 47 èfants du câr pa t't-avô la vile du Mons, su in kilomète, pou ariver a tins al finale k' astot arujistrêye pa RTBF-Vivacité.

Pou fini c' èst co nôs scolîs du Lucsambour k' on cmècer a rëciter lès prumîs. Lès cés d' Châlèrwè ont arivé avu ène eûre du rtârd. Lès rëcitâcions s' ont bin passé, sôf pou la ptite gamine du cink ans, ku l' câr è rindu malôde èt k' è rnôdé su sa bèle cote, duvant l' micro. La co bin k'



nosse Monike sét ossi tnu l' rôle dul binamêye moman ! Adon, i falot co ruvnu, ramon.ner tou
cès èfants la a leû môjon, et rentrer bin tôrd... Vous côzîz d' ovradge du sècrètère ? Èt bin, bon
couradje, ca c' èst toudi su lu tchfô ki mon.ne l' atèlêye k' ont crêe !

Pierre OTJACQUES